

Очра Көкәш—тоомсрта малч

Новосибирск областьд Кривояш—хуучна кезәнък селән. Эн селәнә кеермджнь—шин бәрси долан джилә сургъулин школ болн „Память Кирова“ колхозин шин клуб.

Колхозникудин бәәх бәәдл өдр ирвәс ясрад, седклдән ик байртагъар бәәцхәнә: бичкдүднь сарул, цевр, дулан, кесәәхн школд сургъуль дасджацхана, колхозникуд өдр болгън кино хәләцхәнә, селәнә болн района интеллигенц таасмджта сән лекц умшдж* өгцхәнә.

Эн джил колхоз ик тосхлт кеджәнә: үкрмүд орулдг ик хаша, тугълмуд орулдг хаша тосхад дуусджана, гахас орулх герин девснъгинь экләд тәвджәнә.

Эн колхозд кесг хальмг өркбүл бәәнә. Тедн дотр Очра Көкәш колхозин нег тоомсрта член.

Хальмг танъгъчин Далвнъга нутгин „Красный коневод“ колхозд, ах адуч Очра Көкәш ик тоомсрта, шунмгъа кәдлмштә күн бәәсмн. Далвнъгд, Элстд, Сталинградт нань чигн Балгъсдт болси хургудт Көкәшиг колхознь сунъгъдж ил-

гәдг билә. 1940 джил Москва балгъснур, Цугсоюзин селәнә эдл-ахун гәәхүлд илгәгдсмн. Гәәхүлин комитетин тогтаврар Очра Көкәш күндтә иткмдж цаас авад, үнтә белгәр мөрәлгдсмн.

1944 джиләс нааран Очра Көкәш Новосибирск областин Кривояш селәнд „Память Кирова“ колхозд ах малч болдж кәдлджәнә. Түрүн джиләс авн хәрүлджәси малдан онъган өгәд, уха-седклән тәвәд шунмгъагар кәдлси учрар, колхозин мал ик сән чинәтә, гару уга болад, колхоз джил болгън мал өсгүлгәнә, терүнәс авдг үсн-тосна зурагъан күцәнә. Эн учрар Очра Көкәш джил болгън шанънгдна, олн колхозникуд цугъар Көкәшиг тоомсрта шунмгъа кәдлмштә малч гидж күндлнә.

Колхозин ахлач үр Ф. Барсук, мал хәләлгънд уха-седклән өгси, шунмгъа кәдлмштә, даалгъсиг күцәдг өвгн, эн Очра Көкәшәс малчнр үлгүр авцхах зөвтә,—гидж келнә.

МУТЯЕВ Инджә.

Новосибирск обл. ст. Ояш.